

BROP GUILTS NE PXEEL PABL LO

ZHA TESALÓNICA

1 ¡Diuzh to grëse to!

Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxo^z ne, ni Jesús men ndzon ne rnabey.

²Dios men ne nac Pxo^z ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to riladz to Xtiidz me, ni rleyneraa to samiech to. ⁴Zaatne rdzintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to riladz to me niicle maase rtsidil miech to, niicle maase nroob guielnë ne quided to.

⁵⁻⁶Nli nroob guielnë noyan to, per scagaa laaw noyan to zeena tsieguial to gdzin to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnë dox ne csiaab me.

⁷To ne nac to zha ne quided grë guielnë qui, golgona ganle, gal dze ne quiet Jesús gbaa guiaad me stib, ible zгаа ne descans ne gneedz me. Gal dze co, laa me quietnie grë xanjl me, zha ne rapraa poder; ⁸masaque tib bel dox ne quietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me. ⁹Grëse zho laa me gnabey guey zho lo guielnë dox, zaatne gdzindraa dze griece zho. Lëë bichele zho lo me ga, ib gdzind dze gan zho lo xquielndzon me, gangaa zho grëtaa poder ne rap me. ¹⁰Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me mine biadseed no to.

¹¹Gacxe waa, tibaque laa no quianab lo Dios gacnieⁿ me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo gun to grëse ncuane rquiabladz to, zeena grieequia grëse dziin ne quia^yun to porne riladz to me. ¹²Zeena sca

cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

Ziaad Jesús stib

2 Bets, bzian, ib laa Jesús men ndzon ne rnabey ne no guiaad, ni laa ne gbannie me. ²Zeene gon to laa miech gnè laa dze co bdzinle, niicle gnè zho Espíritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to. ³Ib gdeete to diidz yquidie zho to. Sac gon ansraa ne gdziñ dze co, ib none grieequia grè miech ne gacntseeb lo Dios; lozh ga, laa tib mgui ne nacie mendox grieequiaque, zactntseeb me lo Dios, per gabil ga nitlo me.

⁴Lëe zha co ctsidil grëse zhiwseed Dios, grëse ncuane naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios. ⁵⁻⁶Per no tib men ne notse lo zho niina, laga gdziñ dze ne laa zho guiaad. Golsoladz ganle, blactaa bzeet naa min rii lo to len dze ne blöz naa i.

⁷Grëse ncuane no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho. ⁸Zeene laa zho guiaad, hor co laa Jesús guiaadaque con grè xquielndzon me, dzigo me ne grieeze ro me gloozh me zho, gnitlo me zho.

⁹Masaque mendox gnabey zha ntseeb co, niapse xpoder ma gap zho, nzian ncuane glu zho; zun zho grè ncuane gzee zdoo miech, per led ncuane nlida. ¹⁰Zun zho grè ncuane lozh yquidie zho grè zha ne nole nöz ne nitlo, zha ne ib bzhiguield nililadz mine nac diidzli. Tel niaca mine nililadz zhow, nleynie zhow, nsilaa Dios zho. ¹¹Saan Dios tsienal zho grè ncuane co, ni zililadz zhow zig nac zeene diidzliw; ¹²per ib siaabzi Dios zho, sac laa ne gliladz zho mine nac diidzli, lel mazdraa gleynie zho grè guielntseeb.

Zha ne bdedlaale lo dol

¹³Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiidz me, mine nac diidzli, laa Espíritu Sant csanmbe to lo me. ¹⁴Min co nagon nacie pxeel me no biadseed no to xtiidz me, guien to zha laa to lo dol; zeena gdziñ to zaatne nac lo xquielndzon Jesús, men ndzon ne rnabey ne. Gacxe waa, zha nziuu nac to lo me.

¹⁵Golguien sca, dziits golso, ib csaande to grè mine pseed no to len dze ne biaad no i, niicle mine rneegaa no lo to lo guits ne rxeel no. ¹⁶⁻¹⁷Ni Jesúsaque, men ndzon ne rnabey ne, ni Dios men ne nac Pxoze, me gneedz xfuerz to dziits so to; zeena grëse mine gnee tow, mine gun tow, wen grieequiw. Me blu ganle pa lotaa rleynie me ne, laa me bneedz tib guielbley ne gdziñ dze lozh lo ne, ni psan me diidz pe nac mine naraa no yгаа ne. Ga rlu ganle pa lotaa noxco me ne, niicle ne rioguiald new.

3 Bets, bzian, nu ne laa no csiaalle, laa naa rnab lo to golnab lo Dios gacniē me no, zeēna znuse znuse diiz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow. ²Ni golnab lo me csilaa me no ladznia grē zha ntseeb, zha ne run mine notaa guic; sac gon led grēd miech riladz Xtiidz Dios.

³Dios men ndzon ne rnabey, mine rnee me run mew; gacxe waa, ible zacniē me to dziits so to lo Xtiidz me, ni squianap me to tsobede to ladznia mendox. ⁴Ndion no ne me noyacniē to noyun to grē mine pso no diidz lo to, ni scagaa me gacniē to bii gun tow. ⁵Me gacniē to grieelo gleynie to samiech to zigne rleynie Dios ne, ni guiuude to lo guieinē, sinque golgac zigne been Jesús.

None gun zho dziin

⁶Bets zig zobwi Jesús, laa no rso diidz lo to: Tel cho zha ne nacgrē to i, nēdraa yquia dziin gdziniaa zho ncuaañe gow zho, ib ctsieelsade to zho; sac gon pseete no to min co. ⁷Tel no, gon to ganle zha wban no zeene bliaaz no lo to i; ni sca gon none gban to. Ib bdeddzed no, ⁸biod dze ne lega ndioow zhlē no xcuun miech, blactaa haxta guieel bdziun no dziin bdziniaa no pe pquiin no; ib psodziind no lo to.

⁹Niicle ne ib rieguiā nab no lo to needz to ncuaañe nquiin no, per choot peet bnabd. Mine bdziun no pqiiaa no dziin bdziniaa no pe pquiin no, par gan to ganle zha nonguiel gban to. ¹⁰Led rsoladz to len dze ne bliaaz no i, pso no diidz rii lo to: Zha ne nēd gun dziin, scagaa nodne gow zho. ¹¹Laa niina laaw rzetaque naa stib, sac zidzion no no bla zha ne nacgrē to i, mbe rundraa zho dziin scase quiaded dze zho; loxaque nēzrii nēzrec no zho rzēeb zho lo grē ncuaañe rieguiāld zho. ¹²Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuaañe yquiin zho.

¹³Bets, bzian, ib guieete to, tibaque goltsoxco golgun niapse grē ncuaañe yquiin lo samiech to.

¹⁴Tel cho zha ne nacgrē to i nēd gon diidz gban zho zigne rso no diidz nu, golwi dien chow, dzigo ctsieelsadraa to zho; zeēna sca ctoladz zho. ¹⁵Per gunde to zho zig run zha ne rlēenie samiech, sinque golnee lo zho gac-wen zho; golguien ganle bets to grē to.

¹⁶Jesús nac men ne rtiche grēse zhgab, grēse guiełxtseeb, me cuee to lo grēse zhizhgab to, lo grēse guiełxtseeb gzataa dze. Me gacniē to grēse to.

¹⁷Naa gon nac Pabl, naazhal pqiia bdiuzh rii rxel naa lo to; naazhal pqiia lē naa nu. Golgan ganle lēe xletr naa nu.

¹⁸Jesús men ndzon ne rnabey ne, me gacniē to, me glu lo to ganle pa lotaa noxco me to. *Pabl*